

歸融
承瓌
蕭倣
杜牧

奚敬元
李哲
韋慤

高孚
鄭素卿
劉瞻



竹居攷虞

全唐文

卷七百四十七之七百四十九

行
人
之
事

一
二
三
四
五
六
七
八
九
十

一
二
三
四

一
二
三
四

一
二
三
四
五
六
七
八
九
十

一
二
三
四
五
六
七
八
九
十

欽定全唐文卷七百四十七目錄

歸融

鄭覃平章事制

劾盧周仁進羨餘狀


順宗加謚至德宏道大聖大安孝皇帝議

憲宗加謚昭文章武大聖至神孝皇帝議

奚敬元

唐左羽林軍大將軍史公神道碑

高孚



白雲起封中賦

大唐吳郡張君紀孝行銘

承瓌

張孝子旌表碑贊

并序

李哲

吳郡孝子張常洧廬墓記

鄭素卿

西林寺水閣院律大德齊朗和尚碑

并序

蕭倣

蘄州謝上表

駁還藍田尉直宏文館柳珪擢右拾遺奏

諫懿宗奉佛疏

與浙東鄭商綽大夫雪門生葬扶狀

韋慤

重修滕王閣記

劉瞻

請釋醫官韓宗召康仲殷宗族疏

唐故內莊宅使銀青光祿大夫行內侍省內侍員

外置同正員上柱國彭城縣開國子食邑五百

戶賜紫金魚袋贈左監門衛大將軍劉公墓誌

銘 并序

重刊王閣誌

墓誌

興洛東破前輪大天雷門主韓林

東漢宗奉

郊野益田保南史文前明

禮儀

欽定全唐文卷七百四十七

歸融

融字章之元和中進士開成中拜吏部侍郎檢校禮部尚

書領興元尹出爲山西道節度使徙東川還拜兵部尚書

封晉陵郡公辭疾以太子少傅分司東都大中七年卒贈

左僕射

鄭覃平章事制

朕嗣守丕圖務宏至理憂勤是切宵旰靡遑所以庶政萬
機悉委丞相乃者失於任使妖沴遽生方思正人參我大

柄銀青光祿大夫守尚書右僕射上柱國滎陽郡開國男
食邑二千戶鄭覃天資直氣岳降上才性惟端莊道本孤
峻文含風雅學洞儒元通古今理亂之源達教化損益之
要歷踐華貫周旋大僚休聞彰於縉紳政事滿於臺閣載
居講席密勿內朝胸襟洞開肝膈無隱嘗奏讜論發言有
先見之明每勵貞規勇退守獨立之節洎擢膺揆務總領
庶官堅操不回墜典皆舉盡瘁憂國竭忠戴君必能毗予
一人康濟四海邪正之路旣判清濁之流自分於戲秉茲
鈞衡委乃髦碩爾其使萬事得其序百官得其人用賢罔

不精立法罔不慎弼亮刑政變和陰陽其聽朕言往踐厥
位克紹先德巖廊有光可守本官同中書門下平章事散
官勲封並如故

劾盧周仁進羨餘狀

天下一家何非君土所在方鎮官庫錢皆陛下庫緡錢也
盧周仁輕黷宸嚴輒陳小利務期容受妄說異端若言南
方多有火災故外須防戎寇恐成煨燼請納京師則所進
之餘安可遂無此盧周仁罔思大體姑徇私誠入財貨以
干榮待清朝而何淺貢之無藝實紊彝章伏見今年正月

金定全居
卷一百四十一
二

一日赦文天下藩方四節獻賀三年內猶皆權停周仁所
進頗玷皇化何裨國用臣伏恐萬方從此相效皆以羨餘
爲名縱無羨餘亦因緣刻剋生人受弊起自周仁深不稱
陛下臨軒求太平意也其盧周仁應須重責以例長人者
所進錢伏請却還湖南道收貯以備水旱留貸貧下戶納
兩稅交代相承不得擅用使九有獲蘇一方知感天下幸
甚

順宗加諡至德宏道大聖大安孝皇帝議

臣融議曰王者則高明以茂育法博厚而含宏象日月以

昭臨如雨露而膏澤諡以令德昭於至公卽軒轅顓頊文
王武王是也其有褒旌未副則宜增美尊名惟順宗至德
宏道大聖大安孝皇帝道合二儀明齊兩曜恩沾萬物信
若四時始位踐重光名高少海寢興有度視聽必端昔德
宗駐驛奉天禮行巡狩掃除兇寇實賴春闈每誓眾之初
而吐言激切及撫軍之際皆感動師人洎車馬還都歡娛
宮禁朝夕視膳晨昏問安是居重華毓德望苑日彰孝愛
三十七齡三善益表於元良六氣忽嬰於沉痾德宗以龍
樓重嗣惟疾之憂醫藥躬勞至於大漸順宗昭事德宗之

節也詢古無對德宗厯念順宗之至也前史莫倫父子之
親君臣之義垂榮萬國流慶千年及歷世也天祇承丕構
不敢牢讓方遵永圖師唐虞之治以覆幬天下纂禹湯之
化以煦育黎元薄賦蠲逋宥刑恤隱深仁降感沛澤旁敷
減去宮人斥絕奇貢臨軒廣愛焚鴆毒於通衢凭檻興仁
放猛鷲於維繫歸功臣之甲第而中外謳歌黜殘酷之劇
吏而遠近欣服虔恭九廟睠佑萬邦宵旰勤劬詎思頤衛
於是託付冢嫡壯乎皇猷以明繼明以聖傳聖孝德垂名
於不朽睿謨貽慶于無疆是生聖明收復河隴刷百載失

地之恥滌八聖強鄰之羞陛下不有其功歸美祖考追尊
諡號曰重鴻名易曰天地之大德曰生聖人之大寶曰位
經曰德者同於德道者同於道諡法曰寬裕和平曰安克
慎所安曰孝伏惟順聖皇帝端拱造物秉運統天可謂至
德也感神翊運光明正位可謂大聖也永圖丕構傳聖和
保可謂大孝也臣融定加諡號謹上尊諡曰至德宏道大
聖大安孝皇帝謹議

憲宗加諡昭文章武大聖至神孝皇帝議

臣融議曰皇莫尊乎義軒帝莫大於堯舜咸有上諡光昭

厥猷先德巍巍徽美未稱則必追加大號式重鴻名伏惟
憲宗神聖章武孝皇帝神授英明天假文武德惟孝養仁
著君臨功格元穹伏以天寶之末大厯之中郡國有倔強
之臣朝廷行姑息之令所以李錡拒命自于宗枝劉闢稱
兵起於儒吏伏惟憲宗皇帝上遵太宗之法次覽軒后之
書親近正人委任輔相修明紀綱震動雷霆翦滅渠魁征
討叛亂無職不舉無賢不嗣將靖萬方用於四海號令必
一視聽無私故得夏台伏鎖於沙陘上黨受擒於城鎮西
蜀獻俘而玉京正法東吳納寇而金陵廓開郾城纔下而

申蔡削平鄆師就誅而齊魯盡復皇威遠振神算無遺時
也滄景屏息以朝天易定束身而納地海內無事天下一
家萬國來賓百蠻向化方興謀于戎虜深注意於河湟伏
以疆土開拓而有時腥羶冠帶而有日逐覩赫口休烈留
付中異克主有明聖違以英運睿謀心果疑越古超今陛
下不有其功歸於先志揭茲上善旣讓於天能光祖宗繼
述前聖昨者丞相卿士請加鴻名陛下固秉冲謙再三不
允今追尊祖考榮冠禹湯伏惟憲宗神聖章武孝皇帝乃
聖乃神乃武乃文盛德大業經天緯地記曰武王周公其

達孝矣乎詩曰文王受命有此武功臣融定加諡號謹上
尊諡曰昭文章武大聖至神孝皇帝謹議

奚敬元

敬元吏部侍郎陟子官左補闕

唐左羽林軍大將軍史公神道碑

將軍諱用誠字君諒河南人也曾王父諱惟靜開府儀同
三司檢校太子賓客兼侍御史河南節度先鋒兵馬使大
父勤銀青光祿大夫試太常卿兼侍御史河南節度兵馬
使烈考播銀青光祿大夫檢校國子祭酒河東節度軍馬

都兵馬使兼御史中丞普寧郡王三代爲將克昌惟武垂
慶後世傳芳于公公卽中丞第四子義感得一時之後沈
謀有周身之防貞元初藝成絕倫縱遊郡國名藩重鎮爭
致邀迓乃不屑就其道益光襄陽節度使樊公澤虛心好
才與能樂善聞公有縱橫之畧剛決之姿申縛禮以接之
選右職以署之而能恪勤厥位練習武經繇是樊公益所
委重累遷至馬軍兵馬使會吳少陽卒其子元濟席凶器
以竊據淮蔡詔命唐隨節度使李公愬總齊軍士以討伐
之命公爲遊奕兵馬使指顧麾下號令前驅率先啟行深

入賊境遇敵必戰所向無遺會賊將領徒千人草創營壘
旗號日興橋柵而公伺其軍食無儲是刈是獲備其乾餼
鴟張蟻聚控扼要害公度其孤虛可以攻取以少擊眾如
其前堂堂之勢砮然而斷殺傷奔潰靡有子遺生擒賊將
眾皆請殺而公不聽以客禮待之曰吾不能殺義士從其
歸死於天子乃送其人于闕繼而陳章疏懇請全活憲宗
皇帝英明聰斷詔下許之還賜軍前驅使俾領先鋒將與
公偕行導其銳卒沍寒之夜凌犯雪霜擊破賊城官軍全
入先擒元濟以檻車獻於宗廟得正刑典由公之生致賊

將化爲忠臣覆其妖巢以功補過朝廷推賞累寵旌節授
公銀青光祿大夫檢校太子賓客兼御史中丞仍賜上柱
國詔曰素抱將才能通武訓策名戎旅委質藩方敷七德
以招懷推一心而撫納遂使戴天之大節因事斯彰奉國
之名謀逢時乃合奮其勇士潰彼兇徒堅壁洞開罪人斯
得永言實效無忘寤思其圖爾勞是舉朝典旋以東平不
虔將議征討詔命李愬爲徐泗節度俾行天誅愬以公沈
勇夙彰思同王氏列名表請委以親兵充行營都虞候公
恪勤無私戰陣有勇破賊柵者有六收縣邑者有三教令

必嚴刑戮不濫仁而有法其若是歟賊平遷檢校國子祭
酒詔曰平齊之役諸軍指期衆校合戰各奮毅勇同樹勲
勤永思積日之勞頗愧踰時之賞故於獎授有所超遷時
屬邊事重難非公莫可詔統麾下鎮防朔方居三年朝議
以頻建茂功位未充量趣徵赴闕除左羽林將軍詔曰沈
勇英決挺直將才制勝出奇合於兵法夙勵勤王之節嘗
從伐叛之師赫然殊功於是累振諸侯方岳多有薦揚北
路親軍寄雄心膺統率貔貅之衆申明羽衛之嚴宜獎壯
猷且兼峻秩敬宗皇帝以張韶作亂禍生不測環衛嚴整

狂賊誅夷拜兼御史大夫歲月滋深竭誠盡瘁遷大將軍
知軍事疏封列爵褒寵勲賢勞績旣彰優榮斯及封武昌
縣開國子食邑五百戶上方倚注信臣錫宴別殿論功校
藝公實居多方委爪牙之雄未兼鈇鉞之寄竟以積勞成
疾憂國忘身太和四年歲在庚戌冬十一月乙未薨于昇
平里之私第享齡五十九皇帝軫悼廢朝賻禮加等粵辛
亥二月十五日甲午葬于京兆府萬年縣長樂鄉宋侯之
西原後三月詔贈工部尚書表勲臣也夫人李氏從夫之
貴封趙郡夫人淑慎賢明能正婦道節哀盡哭動合禮經

金定全唐文 卷一百四十一
長子宗簡福王府參軍次子宗授一子出身幼子福郎小
女平娘孩啼孺慕絕及懷抱以敬元昔因朝奏相遇諸途
語及戰伐之事備聞功業之本其子以理命見託固徵斯
文而表諸道蓋不虛美其詞曰

惟天生人必以類分定亂以武克生武臣洸洸史公振輝
羣倫正直不回剛決無鄰沐若膏雨煦然陽春濟以寬猛
施之威仁三代爲將道家所忌爲將四世彌彰勇毅制勝
出奇料敵善利全活擒生度材任知寒天雪夜萬里齊轡
攻討賊城致之死地干戈旣戢弓矢載橐懋功旣立爰議

賞勞謙勤愈彰寵錫彌高貴婚華憲輝映賢豪王者之師
勝殘去殺由不得已在懲桀黠惟公訓齊確然不拔令亦
寬簡政不苛察羽林震衛克壯其猷推誠心膂練習貔貅
忘身奉君勞積生憂運促潛奪名在建侯追榮八座寵錫
威武葬于九原軫悼明主勲名獨在骨肉歸土表行豐碑

垂休萬古

高孚

孚文宗時人官許昌縣主簿

白雲起封中賦

以皇漢施德介
邱告成爲韻

客有遭逢漢昌從武帝而登岱觀白雲之效祥曰此蓋非
常不飄不揚初起封中方郁郁以呈象稍浮山上乍英英
而有光原初出之義也告成我皇我皇德以靜人威以平
難廓清諸夏光啟大漢俗既和兮考時巡禮既備兮登日
觀惟天輔聖無雨則其明徵惟岳通元出雲所以幽贊不
然者山有四岳胡獨興於此地有四極胡不普而施觀耀
質以流彩若無心而有知無心者何隨車而動息有知者
何表聖之功德帝穆清以修祀雲故清其容帝貞白以爲
心雲故白其色豈徒然也君爲萬國所仰岳乃眾雲所屬

其垂思儲精登封俯拜亦庶幾乎明神斯荅景福攸介故
夫是雲也乘元氣而出冠靈壇而浮不漠漠以四散直亭
亭於上頭祥光內朗瑞色旁流旣表慶于茲日復增華於
介邱此可以見其無疆之休者也且夫刻石者所以紀號
泥金者所以昭告必元德之已升乃茲山之可造若齊桓
僭侈秦帝驕暴縱傾國以修封豈嘉祥之云報美矣哉晝
日斯清瑞雲孔明綑縕蕭索下應一人之感髣髴影響旁
聞萬歲之聲彼入房彰於殷帝浮洛表於周成豈可與茲
而名哉

大唐吳郡張君紀孝行銘

君名常洧字巨川句曲人也其先奕世載德錫姓受氏詳
乎家牒炳乎國史矣在昔宣王時則有若張仲孝友周人
美之列于風雅在悼公時則有若張老恢晉國之圖拯魏
氏之急魯史嘉之編于簡冊高祖伯卿曾祖元紹並怡情
典墳抗志不仕祖處靜皇湖州烏程令考章皇建州司戶
君卽建州之第四子也幼而聰敏長而岐嶷窮百行之源
事父母以孝稟五常之性奉親族以和及父母旣沒居憂
泣血柴毀骨立躬自建塚高數尋手植奇樹盈千餘本然

志戀墳塋將終身灑掃雖喪紀逾制而靡釋衰絰乃葺洁
庵廬居于墓次哀動行路感通神明白鶴翔于林中露
生于墓側鄉黨稱其孝郡邑嘉其行錄表上聞優詔允荅
復其徭役旌其倚廬三紀于茲情不一異君嘗疾困殆不
勝喪勺飲不入口者累日矣其兄常泳勸令飲食固辭不
從兄謂之曰有疾飲酒食肉在禮自有明文無以死傷生
也今汝異居幽荒之際而卽安于疾殆至滅性又安得爲
孝乎乃曰吾負終身之憂匪惟一日之戚且吾有兄不患
死之將至兄有子不患祀之將乏身既不賴其生口豈復

金定全居
卷之四十七
二
食其味乎君子曰甚哉張氏兄弟孝之大者也非常令弟無以知兄之賢非仁兄無以成弟之美所及其遠哉上以彰聖朝孝理之至中以表牧宰奉化之極下以明張君錫類之永此一行也而三善成焉乎雖庸愚備知盛美竊以寵錫之命雖行表于門閭紀述之詞曾未標于篆刻敢直書其事識之貞石焉銘曰

天錫嘉命保佑我唐篤生張君令名是揚令名伊何純孝克彰終身在戚執親之喪獨居幽荒廬墓之側喪制既踰哀情罔極衰經弗離甘旨靡食疾苦嬰身志行不忒節彼

高墳巍然如岡草木呈瑞鸞鶴表祥孝感之至達于聖皇
詔命旌美殊其井疆勒銘紀行于門之旁千秋萬祀斯風
不忘

承瓌

瓌太和中官潤州句容縣主簿

張孝子旌表碑贊

并序

昔原涉廬于墓三載人至于今稱之况吳郡張生父母繼
歿匍匐墳土寤處苦塊棄絕人事凡三十一年號泣終身
故至性感物精誠動天靈芝繼生嘉祥廣至鄉里仰其道

狼戾者爲之恭恪悖慢者爲之孝慈郡縣以聞于是天子
寵以旌表當代著之歌謠又太和六年姪孫公珽繼亦廬
于墓時職留務于金陵日御史譚公爲清時名士深用褒
焉曰張家至孝已傳三世可革人俗變諸鄉閭不匱之美
萃于張氏矣而張氏世傳儒素家唯四壁大唐之璽書文
人之麗藻雖傳諸子孫而未寘于金石會其諸兄之孫曰
琢以經學著名游太學垂十年有貞介之行有恭懿之
德事親愛以順交朋友以信邠帥知之辟主印真寧糾迭
滯疑綏懷孤弱真寧有單父武城之化民皆翕然秩滿歸

鄉經先人之舊廬悼盛事之未樹喟然嘆息霈然涕洟乃
出琴書車馬以鬻焉取其資繕葺廊廡芟夷榛荆咸取敕
旨勒于貞石使永不泯夫建邦立家唯忠與孝有一於此
宜乎不朽君斯舉也上宣吾君之命下顯爾祖之休盡善
盡美矣贊曰
天經地義其惟孝焉六順之始百行之先哲人斯難爾祖
有旃土闕徒立荆榛滿阡永錫之道將不匱焉吾儕感此
深用惘然乃紀貞石是昭是宣豐碑旣樹厥美方傳俾其
不朽永慰荒埏

李哲

哲官潤州句容縣令

吳郡孝子張常洧廬墓記

人與天地同有孝與父子偕生道德失而稱仁哀慕結而滅性於是先王立中制三年通喪人倫以達然孝子之心感逐時并感隨身盡句容張常洧哀親之不返將已以爲殉鄉閭懼法孝子違心長號天高侍宿墳側歲移六次人無二行柴骨杖起蓬頭羶垂非禮教之所知非名實之相與誠至孝之所致而至于斯也余執事之日耆老趙某等

共舉之愴然感懷因自俯慰申州上請以表門閭州司慮
其矯情異眾飭哀求顯事留精詳時多永嘆國體不以殊
行立法故旌善以激俗史館編集傳記頒令搜揚今年八
月觀察使御史中丞王公錄上尚書省明詔未及幽魂已
慶惟此孝子行之實難余替人喬公體包仁和志存感激
異斯事舉請余記之

鄭素卿

素卿太和時人

西林寺水閣院律大德齊朗和尚碑

并序

大師號齊朗生報身于尋陽陶氏承大司馬侃之後侃捨
宅作西林寺其孫累有人繼前志故大師幼有覺心事峰
頂寺律大德法真爲和尚出家受具皆目其下傳七支四
分學精進勇猛所治如官之與憲法其徒肅而不敢犯故
自山發其風行諸道流若鈞衡繩墨所化之處無不斷斷
爾所居水閣院水閣之稱天下知重長講律業兼通無量
壽淨名等經復手自爲義記以示後學貞元三年從峰頂
本大師陪荊州慶門寺靈裕台州國清寺法裔同受廉使
李公兼龍興壇場之請洎七年刺史崔公衍置方等於當

州開元寺請東林大德熙怡大林法粲興果神清同赴壇
會十四年郡守李公康興甘露之會請宣州開元寺大德
慧莊撫州景雲寺上宏吉州靖居寺道華當州寶稱寺智
滿同秉羯磨至元和初鄂岳觀察使郝公士美建法會于
頭陀寺又命簡奉迎曰鵝珠在冰雪之中鶴貌出風塵之
外其感摺紳大人相知之深如此享年七十有三法歲四
十有九示寂滅于長慶二年十月十六日用是年閏月二
十一日奉葬于峰頂大師靈塔之右恭遺命也嗚呼凡與
大師遊者自童年及暮齒未嘗以言色高下用戕于人人

之聰月覩此知教雖庭戶之近必擬跡而後行或饑寒之
來必審公而後取所謂聲爲律身爲度其殆庶乎或人來
以持律相難者對之曰吾聞四十不惑以至無邪正當師
之我法只爾聞者降伏知言要理深自洪州升龍興寺壇
轉至甘露頭陀惣一十有四會承羯磨者數盈千萬計故
江西以爲佛法鐘鼓皆自水閣出考功員外郎李公渤中
書舍人白公居易嘗視郡事得之精微每至道場膜拜起
敬門人元超元諫元膺元諲元皓清銳元惣智明等懼先
師之德光不留於金石乃以本際實行付雲皐比丘草具

狀藉門弟子大德道建如達沖契宗一等虔請碑銘于滎
陽鄭氏子素卿辭不能免乃強起筆應之曰釋之徒有持
律猶官之徒有持法二者謹嚴則教立而道尊惟大師以
惠覺心以心治身秉佛憲書爲佛翰垣調馭諸根不生一
塵提導孺孩出離火燔昇我漸堦入我便門慈覆軒軒法
灑翻翻膏之清濡長之茂蕃故自匡廬散吳楚間受教比
邱知處元關或坐道場或登戒壇景我之山派我之川珠
貫大千印可無邊來也不羈去之偶然吁嗟乎西林佛日
嘗在此今已焉太和六年歲次壬子三月甲午朔六日己

已門人元諫等樹

蕭

倣字思道宰相俛從父弟太和元年進士咸通中歷禮戶
二部侍郎拜義成軍節度使入爲兵部尚書歷吏部兵部
以本官同平章事遷中書門下侍郎進司空宏文館大學
士蘭陵郡侯罷爲嶺南節度使卒年八十

新州謝上表

臣某言臣謬掌貢闈果茲敗失上負聖獎下乖人情實省
已以競慙每自咎而煌灼猶賴陛下猥矜拙直特貸刑書

不奪金章仍付符竹荷恩宥而感戀奉嚴謹以奔馳不駐
羸驂繼持舟棹臣二月十三日當日於宣政門外謝訖便
辭進發今月一日到任上訖臣誠惶誠懼頓首頓首臣性
稟朴愚材昧機變皆爲叨據果竊顯榮一心惟知効忠萬
慮未嘗念失是以頃升諫列已因論事去官後忝瑣闈亦
緣舉職統旃身流嶺外望絕中朝甘於此生不到上國伏
過陛下臨御大寶恭行孝思詢以舊臣徧霑厚渥臣遠從
海嶠首還闕廷才拜丹墀俄捧紫詔任掄材於九品位超
冠於六曹家與國而同歸官與職而俱盛常思惕厲麤免

悔尤已塵銓衡復忝商務昨雖有過今合具陳臣伏以朝
廷所大者莫過文柄士林所重者無先辭科推公過卽怨
讟並生行應奉卽語言皆息爲日雖久近歲轉難如臣孤
微豈合操刑徒以副陛下振用明時至公是以不聽囑論
堅收沈滯請託旣絕求瑕者多臣昨選擇實不屈人雜文
之中偶失詳究扇眾口以騰毀致朝典以指名緘深懇而
闕一得敷陳奉詔命而須乘郵傳罷遠藩赴闕還鄉國而
字只及一年自近侍謫官歷江山而又三千里泣別骨肉愁
涉險艱今則已達孤城唯勤郡政緝綏郭邑訓整里閭必

使獄絕寃人巷無橫事峻法鈐轄於狡吏寬宏撫育於疲
農麤立微勞用贖前過伏乞陛下特開睿鑒俯察愚衷臣
前後黜責多因奉公秉持直誠常逢於黨與分使如此時
亦自咍肝膽而上告明君希衰殘而得還帝里豈望復
升榮召入被寵光願受代於蘄春遂閑散於輩下臣官爲
牧守不同藩鎮謝上之後他表無因達天聽而知在何時
備繁辭而併陳今日馳魂執筆流血拜章形神雖處於遐
陬夢寐尚馳於班列臣無任感恩惶恐涕泣望闕屏營之
至謹差軍事押衙某奉表陳謝以聞

駁還藍田尉直宏文館柳珪擢右拾遺奏

伊下高懸爵位本待賢良既命澆浮恐非懲勸珪居家不
稟於義方奉國豈盡於忠節闕下

諫懿宗奉佛疏

臣聞元祖之道由慈儉爲先而素王之風以仁義爲首相
洽百代作則千年至聖至明不可易也如佛者生於天竺
去彼王宮割愛中之至難取滅後之殊勝名歸象外理絕
塵中非爲帝王之所能慕也昔貞觀中高宗在東宮以長
孫皇后疾亟嘗上言曰欲請度僧以資福事后曰爲善有

徵吾未爲惡善或無報求福非宜且佛者異方之教所可
存而勿論豈以一女子而紊王道乎故諡爲文德且母后
之論尚能如斯哲王之謨安可反是伏覩陛下留神天竺
屬意桑門內設道場中開講會或手錄梵筴或口揚佛音
雖時啟於延英從容四輔慮稍移於聽政廢失萬機居安
思危不可忽也夫從容者君也必疇咨於臣蓋忠匡救外
逆其耳內沃其心陳臯陶之謨述仲虺之誥發揮王道恢
益帝圖非賜對之間徒侍坐而已夫廢失者上拒其諫下
希其旨言則狎玩意在順從漢重神仙東方朔著十洲之

金定全唐文 卷一百四十一
記梁崇佛法劉孝義詠七覺之詩致祠禱無休講誦不已
以至大空海內中輟江東以此言之是廢失也然佛者當
可以悟取不可以相求漢晉以來互興寶刹姚石之際亦
有高僧或問以苦空究其不滅止聞有性名曰忘言執著
貪緣非其旨也必乞陛下力求民瘼虔奉宗祧思謬賞與
濫刑其殃立至俟勝殘而去殺得福甚多幸罷講筵頻親
政書昔年韓愈已得罪於憲宗今日微臣固甘心於遐徼
與浙東鄭商綽大夫雪門生薛扶狀
某昨者出官之由伏計盡得於邸吏久不奉榮問惶懼實

深某自守孤直蒙大夫眷獎最深輒欲披陳其事畧言首
尾冀當克副虛襟鑒雪幽抱伏以近年貢務皆自閣下權
知某叨歷清崇不掌綸誥去冬遽因銓衡叨主文柄珥貂
載筆忝幸實多遂將匪石之心冀伸藻鏡之用壅遏末俗
蕩滌訛風刈楚於庭得人之舉而騰口易唱長舌莫箝吹
毛豈惜其一言指頰何啻於十手旣速官謗皆由拙直竊
以常年主司親屬盡得就試某敕下後榜示南院外內親
族具有約勒並請不下文書斂怨之語日已盈庭復禮部
舊吏云常年例得明經一人某面責其事卽嚴釐革然皆

陰蓄狡恨求肆蠹言致雜文之差互悉羣吏之構成失於
考議敢不引過又常年榜帖並他人主張凡是舊知先當
垂翅靈蛇在握棄而不收璞鼠韜懷疑而或取致使主司
脅制於一時遺恨遂流於他日今春此輩亦有數人皆朝
夕相門月旦自任共相犄角直索文書某堅守不聽唯運
獨見見在子弟無三舉門生舊知纔數人推公擢引且旣
在門館日夕卽與子弟不生爲輕小之徒望風傳說曰筆
削重事閨門得專某但不欺知白之誠豈畏如簧之巧頃
年赴廣州日外生薛廷望薦一李仲將外生薛扶秀才云

負文業窮寄嶺嶠到鎮日相見之後果有辭藻久與宴處
端厚日新成名後人傳是蕃夷外親嶺南巨富發身財賂
委質科名扶卽薛謂近從兄弟班行內外親族絕多嶺表
之時寒苦可憫曾與月給虛說蕃商據此謗言豈麤相近
况孔振是宣父胄緒韓綰卽文公令孫蘇薦故奉常之後
鴈序雙高而風埃久處柳告是柳州之子鳳毛殊有而名
字陸沈其餘四面搜羅皆有久居藝行之士繁於簡牘不
敢具載某裁斷自己實無愧懷敦朝廷厚風去士林時態
此志惶撓豈憚悔尤今則公忠道消奸邪計勝眾情猶有

惋歎深分却無憫嗟何直道而遽不相容豈正德而亦同
浮議久猜疑悶莫喻尊崇幸無大故之嫌勿信小人之論
麤陳本末希存舊知臨紙寫誠含毫增歎特垂鑒宥無輕
棄遺幸甚

韋慤

慤字端士太和初進士大中朝拜禮部侍郎出領方鎮卒

重修滕王閣記

鍾陵郡控連山大江環合州城揭起樓榭遊之者莫不目
駭魂褫號爲一方勝槩先是背郭郭不二百步有巨閣稱

滕王者懿夫峻修廣袤非常製所能擬及考尋結構之始
蓋自永徽後時滕王作蘇州刺史轉洪州都督之所營造
也距今大中歲戊辰亦將垂三百年徒嘉乎飛翬疊欒虎
踞龍盤發地呈形與山同安曾不知盪滌不必繫於天災
興廢自叶於時數將利恢復果憑智謀故我雁門公按節
廉問方頒條詔令肅而兵戎讐服政和而疲瘵昭蘇妙撫
循則有袴襦咸獲之謠寬賦斂且無杼軸皆空之歎歲比
善熟俗臻治平故州民相與稱賀繼而歌曰自公之來闔
境謹哈飲公之化若乳嬰孩雖國僑理鄭國而多方長孺

緝淮陽而布效方公今日不足過也宜乎享享祉居全功
無何值祝融發其災回祿煽其烓曾未竟夕煤倂秋蓬則
斯閣之製盪無餘矣其他廩廡之地接續郵亭蕘棟纒連
疾飈一驚遂至延及公至是領徒夜出俾撤屋開道毒燄
方熾逡巡不能救翼日公乃往觀焉召將校謂之曰吾幸
得備位廉察不能懇求人瘼敬避天戒致火之患時予之
辜遂審量日力詳度費務役不加重而烝徒湊事協于中
而公用省眾謂難集我方指期遂得鑿鼓不勝而築之閣
閣梓材並構而勢已耽耽自非智用周敏政齊畫一則安

能勑規模之豐麗如彼程制造之速疾如此不有廢絕孰
能興耶今按舊閣基址南北濶八丈今增九丈三尺其峻
修北自土際達閣板高一丈二尺今增至一丈四尺濶板
上舊長一丈今增至一丈三尺中柱北上聳于屋脊長二
丈四尺今增至三丈一尺舊正閣通龜首東西六間長七
丈五尺今增至七間共長八丈六尺濶三丈五尺固可謂
宏廓顯敞殊形詭狀革故鼎新有如是乎况前通舟車迴
瞰江嶺每值美景讌集笙歌散迂遠凝宵漢上軼雲雨卽
未知三山之靈仙窟穴五湖之賢達沈浮其於歷賢勝負

果又何如耳故自焚爇之後又建是閣廣其郵驛廳事接
以飛軒累榭復架連樓小閣對峙高揭旁通江亭津館致
巧銜能迴廊并抱以交映邃宇相縈而不絕則是閣也冠
八郡風俗之最包四時物候之異春之日則花景鬪新香
風襲人憑高送歸極目蕩神夏之日則鶯舌變哢葉陰如
棟紈扇罷搖綺窗堪夢秋之日則露白山青當軒展屏涼
風遠來沈醉易醒冬之日則簷外雪滿幄中香暖耐舉罇
竚好聽歌管則斯閣之盛縱遊之美賞心樂事庸可旣乎
夫易舊圖新樹非常之績天其或者必將候魁岸博達負

出人智能而俾張大其所爲不然何當瘡痍未復之前而
妙於救藥煨燼已成之末而遽及經營况不奪農時不斲
人力帑藏免竭日時免賒觀之者咸謂神化翕忽殆非人
力之所爲也噫夫瓌譎特殊巍峩相扶似乘靈濤湧出方
壺華厦崢嶸開闔睢盱用鎮遐俗尤光奧區是必知後千
百年閣之名焉與公之政俱垂不朽矣至如江山之重複
物產之殷充亭臺增葺以雲蔓解署繕完而櫛比布在圖
籍孰能該詳慤今所以爲異者但舉乎閣之廢矣自公復
興而已其他壯麗形勝已備列諸公述作故不能一二觀

縷時大中執徐歲秋八月哉生明記

劉瞻

瞻字幾之其先彭城徙桂陽太和初進士又登博學宏詞
科咸通中拜戶部侍郎充翰林學士以本官同平章事加
中書侍郎兼刑部尚書集賢殿大學士罷爲荆南節度使
再貶驩州司戶參軍僖宗立徙康州刺史量移號州以刑
部尚書召復以中書侍郎平章事卒

請釋醫官韓宗召康仲殷宗族疏

臣聞修短之期人之定分賢愚共一今古攸同喬松薜花

稟氣各異至如錢鏗壽考不因有智而延齡顏子早亡不
爲不賢而促壽此皆含靈稟氣修短自然之理也一昨同
昌公主久嬰危疾深軫聖慈醫藥無徵幽明遠隔陛下過
鍾宸愛痛切追思爰責醫工令從嚴憲然韓宗召等因緣
藝術備荷寵榮想於診候之時無不盡其方術亦欲病如
沃雪藥暫通神其奈禍福難移竟成差跌原其情狀亦可
哀矜而差悞之愆死未塞責自陛下雷霆一怒朝野震驚
囚九族於狴牢因兩人之藥悞老幼械繫三百餘人咸云
宗召荷恩之日寸祿不霑進藥之時人不同議此乃禍從

天降罪匪已爲物議沸騰道路嗟嘆陛下以寬仁厚德御
宇十年四海萬邦咸歌聖政何事遽移前志頓易初心以
達理知命之君涉肆暴不明之謗且殉宮女而違道囚平
人而結冤此皆陛下安不思危忿不顧難者也陛下信崇
釋典留意生天大要不過喜捨慈悲方便布施不生惡念
所謂福田則業累盡消往生忉利比居濁惡未可同年伏
望陛下盡釋繫囚易怒爲喜虔奉空王之教以資愛主之
靈中外臣寮同深懇激

唐故內莊宅使銀青光祿大夫行內侍省内侍員

外置同正員上柱國彭城縣開國子食邑五百

戶賜紫金魚袋贈左監門衛大將軍劉公墓誌

銘 并序

公諱遵禮字魯卿帝堯垂裔實分受姓之初隆漢勃興更
表昌宗之盛靈源彌遠瑞慶斯長史不絕書代稱其德曾
祖諱英皇任游擊將軍守左武衛翊府中郎將韜鈴奧術
倜儻奇材運阨當年位不及量僖伯有後累生英賢烈祖
諱宏規皇任左神策軍護軍中尉特進行左武衛上將軍
知內侍省事贈開府儀同三司揚州大都督沛國公佐佑

累朝出入貴仕文經武畧茂緒嘉庸誓著山河勲銘金石
訓傳令嗣慶集德門卽今開府儀同三司內侍監制仕徐
國公名行深也公卽開府第五子穎悟於齠齔溫克於童
蒙孝敬自稟於生知忠恪允符於夙習爰當妙齒卽履宦
途以寶厯二年入仕重位要權爭用爲寮窳資鴻漸之勢
俟麟角之成雍容令圖遜讓美秩開成五年方賜綠授將
仕郎掖庭局宮教博士充宣徽庫家地密務殷選清材稱
舉止有裕階資漸登會昌元年授登仕郎四年授承務郎
常在禁闈日奉宸扆皆貴游之子弟爲顯仕之梯媒清切

無倫親近少比特加命服仍領太醫六年賜服銀朱加供
奉官轉徵仕郎內僕局令充監醫官院使親承顧問莫厚
於宣徽榮耀服章無加於紫綬其年六月授宣義郎改充
宣徽北院使十一月賜紫金魚袋階秩表仕進之績爵邑
列恩寵之榮旣屬上材因降優命大中二年授朝散大夫
彭城縣開國子食邑五百戶密侍右遷樞軸備選邊防經
制才畧所先公論咸推帝命惟允五年改充宣徽南院使
尋兼充京西京北制置堡戍使疆場設備今古重難俾無
奔突之虞用致煙塵之息凡所更作大叶機宜與能疇勞

換職進秩其年使迴改大盈庫使旋授宮闈局令夫良弓
勁矢武衛戎裝器號魚文名掩繁弱帑藏之貯進御是須
多資峻嚴以綰要重七年改內弓箭庫使又以上田甲第
職夥吏繁禁省之中號爲難理苟非利刃寧愒劇權八年
改內莊宅使出護戎機實爲重寄受厯試之選膺貞律之
求爰以周通遂俞推擇九年改充海監軍使共綏武旅旁
協師臣儻非其材亦罕濟用雅聞懿績更莅雄藩十二年
改鄆州監軍使出入之宜勞逸是繫履踐之美重沓爲優
十三年赴闕明年授營幕使其年再領弓箭庫使咸通元

年十二月轉掖庭令雲螭注產驥子龍孫當星馳電逸之
場列中阜內閑之藉寶鞭玉勒足踈首驤繫於伯樂之知
懸在伏波之式鑿精事重匪易其人三年遂授內飛龍使
休聲益暢睿渥彌敷進於崇班示以懋賞四年授內侍省
內侍地控西陲任當戎事思得妙畧冀絕邊虞五年改邠
寧監軍外展殊勲內缺要務人思舊政主洽新恩七年復
拜內莊宅使顧遇益隆兢謹愈至將申大用先命崇階八
年授銀青光祿大夫嗚呼得君逢時材長數促性命之際
賢哲莫窮咸通九年孟夏遘疾優旨許歸就醫藥鍼砭無

及湯劑徒施莫逢西域之靈香遽嘆東流之逝水以其年
六月十四日薨于來庭里私第享年五十三八月五日詔
贈左監門衛大將軍竊惟開府以仁誼承家用忠貞事主
德齊嵩華量廣滄溟便蕃顯榮洋溢功業掌鈞衡則彌縫
大政綰戎務則訓齊全師勤以奉公寬而濟眾書于史冊
播在朝廷故得朱紫盈門輝光滿目公之仲季時少比倫
並以出人之材各奉趨庭之訓優秩佳職後弟前兄而公
不享遐齡豈神之孤眾望也是以開府惋惜軫極悲懷夫
王咸陽縣君田氏四德咸臻六姻共仰婦道克順母儀聿

修有子四人長曰重易給事郎內侍省內府局丞次曰重
允宣徽庫家登仕郎內侍省奚官局丞又其次曰重益曰
重則並已賜綠皆以孝愛由已明敏居心在公處私克守
訓範以似以續家肥國華今則喪過乎哀愾焉在疚宅兆
旣卜日月有時十一月八日銜哀奉喪窆于萬年縣崇義
鄉漣川西原禮也佳城永閔昭代長違生也有涯前距百
齡纔及半死如可作後遊九原當與歸瞻叨職內廷特承
宗顧刊刻期于不朽叙述固以無私銘曰
積德之孫大勲之嗣允文允武有材有位旣遇明時將膺

寵寄樞機之任咫尺而至命不副才期而爽遂崇崇德門

先先令子垂裕後昆流千萬祀

...

...

...

...

...

...

...

欽定全唐文卷一百四十八目錄

杜牧

何房宮賦

望故園賦

晚晴賦 并序

高元裕除吏部尚書制

崔瓘除刑部尚書蘇滌除左丞崔璵除兵部侍郎

等制

裴休除禮部尚書裴諗除兵部侍郎等制

畢誠除刑部侍郎制

韋有翼除御史中丞制

趙真齡除右散騎常侍制

韓賓除戶部郎中裴處權除禮部郎中孟璩除工

部郎中等制

鄭處晦守職方員外郎兼侍御史知雜事制

庾道蔚守起居舍人李文儒守禮部員外郎充翰

林學士等制

李朋除刑部員外郎李從誨除都官員外郎等制

權審除戶部員外郎制

皇甫鈺除右司員外郎鄭深除侍御史內供奉等

制

韋退之除戶部員外郎裴德融除殿中侍御史盧

穎除監察御史等制

李蔚除侍御史盧潘除殿中侍御史等制

盧告除左拾遺制

蕭峴除太常博士制

杜濛除太常博士制

馬曙除右庶子王固除太僕少卿王球除太府少卿等制

李叔玫除太僕卿高証除均州刺史萬汾除施州刺史等制

李珣冊贈司空制

歸融冊贈左僕射制

令狐定贈禮部尚書制

李訥除浙東觀察使兼御史大夫制

盧博除廬州刺史制

李文舉除睦州刺史制

竇宏餘加官依前台州刺史蘇莊除鄧州刺史等
制

李暨除絳州刺史魏中庸除亳州刺史曹慶除威
遠營使等制

...

...

...

...

...

欽定全唐文卷七百四十八

杜牧

牧字牧之，駕部員外郎。從郁子第進士，復舉賢良方正文。宗朝，官殿中侍御史，遷左補闕，轉膳部比部員外郎，歷黃池、睦、三州刺史，遷司勳員外郎，轉吏部，授湖州刺史，入拜考功郎中，知制誥，遷中書舍人，卒年五十。

阿房宮賦

六王畢，四海一，蜀山兀，阿房出，覆壓三百餘里，隔離天日，驪山北構而西，折直走咸陽，二川溶溶，流入宮牆，五步一

樓十步一閣廊腰縵迴簷牙高啄各抱地勢鉤心鬪角盤
盤焉困困焉蜂房水渦矗不知乎幾千萬落長橋臥波未
雲何龍複道行空不霽何虹高低冥迷不知西東歌臺暖
響春光融融舞殿冷袖風雨淒淒一日之內一宮之間而
氣候不齊妃嬪媵嬙王子皇孫辭樓下殿輦來於秦朝歌
夜絃爲秦宮人明星熒熒開粧鏡也綠雲擾擾梳曉鬟也
渭流漲膩棄脂水也烟斜霧橫焚椒蘭也雷霆乍驚宮車
過也輓輓遠聽杳不知其所之也一肌一容盡態極妍縵
立遠視而望幸焉有不得見者三十六年燕趙之收藏韓

魏之經營齊楚之精英幾世幾年剽掠其人倚疊如山一
旦不能有輸來其間鼎鑄玉石金塊珠礫棄擲邈迤秦人
視之亦不甚惜嗟乎一人之心千萬人之心也秦愛紛奢
人亦念其家柰何取之盡錙銖用之如泥沙使負棟之柱
多於南畝之農夫架梁之椽多於機上之工女釘頭磷磷
多於在庾之粟粒瓦縫參差多於周身之帛縷直欄橫檻
多於九土之城郭管絃嘔啞多於市人之言語使天下之
人不敢言而敢怒獨夫之心日益驕固戍卒叫函谷舉楚
人一炬可憐焦土嗚呼滅六國者六國也非秦也族秦者

金定全唐文 卷之四十一 二
秦也非天下也嗟夫使六國各愛其人則足以拒秦秦復
愛六國之人則遞三世可至萬世而爲君誰得而族滅也
秦人不暇自哀而後人哀之後人哀之而不鑑之亦使後
人而復哀後人也

望故園賦

余固秦人兮故園秦地念歸途之幾里訢余心之未歸兮
雖繫日而安至旣操心之大謬欲當時之奏技技固薄兮
豈易售矧將來之歲幾人固有尚珠金印節人固有爲背
憎面悅擊短扶長曲邀橫結吐片言兮千口莫窮觸一機

而百關俱發嗟小人之顛蒙兮尚何念於逸越余之思歸
兮走杜陵之西道巖曲天深地平木老隴雲秦樹風高霜
早周臺漢園斜陽暮草寂寥四望蜀峰聯嶂葱龍氣佳蟠
聯地壯繚粉堞於綺城矗未央於天上月出東山苔扉向
關長烟苒惹寒水注灣遠林雞犬兮樵夫夕還織有桑兮
耕有土昆令季強兮鄉黨附悵余心兮捨茲而何去憂豈
無念念至謂何憤慍悽悄顧我則多萬世在上兮百世居
後中有一生兮孰爲壽天生旣不足以紉佩兮顧他務之
纖小賦言歸兮余之志世徒爲兮紛擾

晚晴賦 并序

秋日晚晴樊川子目于郊園見大者小者有狀類者故書賦云

雨晴秋容新沐兮忻遶園而細履面平池之清空兮紫閣青橫遠來照水如高堂之上見羅幕兮垂乎鏡裏木勢黨伍兮行者如迎偃者如醉高者如達低者如跂松數十株切切交峙如冠劍大臣國有急難庭立而議竹林外裹兮十萬丈夫甲刃縱縱密陣而環侍豈負軍令之不敢囂兮何意氣之巖毅復引舟於深灣忽八九之紅芰姹然如婦

斂然如女墮藥黥顏似見放棄白鷺潛來兮邈風標之公
子窺此美人兮如慕悅其容媚雜花參差於岸側兮絳綠
黃紫格頑色賤兮或妾或婢間草甚多叢者束兮靡者杳
兮仰風獵日如立如笑兮千千萬萬之容兮不可得而狀
也若予者則謂何如倒冠落魄兮與世闊疎敖敖休休兮
真狗其愚而隱居者乎

高元裕除吏部尚書制

勅昔有虞氏貴德尚齒言於四代其道最優今吾卿老富
有道德以大冢宰表率羣寮顧予敢專得於僉議前山南

東道節度管內觀察處置等使銀青光祿大夫檢校尚書
使持節襄州諸軍事兼襄州刺史御史大夫上柱國渤海
縣開國男食邑三百戶高元裕始以御史諫官在長慶寶
曆之際匡拂時病磨切貴近罔有顧慮知無不爲復以諫
議舍人在大和末詞摧凶魁坐折左宦繼爲中丞京兆公
卿藩服朕始在位徵歸朝廷爰自尚書裂分茅土爲政以
德行已惟仁信而履之服而樂之餘三十年道益昭著夫
中外之任迭有重輕今者干戈蘊藏戎狄信順將欲詳考
典禮開張教化使吾丞相已降有所咨稟非爾元裕其誰

膺之至於官業豈勞倚任祇聽出納無忘教戒可守吏部
尚書散官勲封如故

崔燥除刑部尚書蘇滌除左丞崔璵除兵部侍郎

等制

勅喉舌百官之本綱轄天下之要戎政國之大事三人爲
衆一舉得之唯君知臣子不敢讓正議大夫尚書左丞上
柱國賜紫金魚袋崔燥德可標準言成文章揚歷中外道
益光顯左省駁議不畏強禦分憂陝服尹茲東郊政旣安
人化能被俗擢任藻鑒旋職牢籠材皆適宜官無逋事分

鎮股肱之郡遂成功實之臣陟處綱曹副以中憲每師遽
瑗常募史魚抨彈之勇正當時病翰林學士承旨銀青光
祿大夫行尚書兵部侍郎知制誥武功縣開國男食邑三
百戶蘇滌行冠人倫爵高天秩仁義禮樂之是務克伐怨
欲之不行翺翔禁闈出入諷議汲黯爲郡嘗聞卧理下惠
去國皆以直道洎宣室思賈甘泉召雄造膝盡忠代言稽
古近以微恙懇請自便君子之道進退可觀正議大夫前
權知尚書戶部侍郎上柱國博陵縣開國子食邑五百戶
賜紫金魚袋崔璵上知自得不器難名旣擅高文兼通古

學掌言綸閣典貢春闈詞同三代之風士掇一時之秀振
舉職業昭宣令名詩曰多士文王以寧禮曰官備天子爲
樂咨爾璪等實瑞清時予爲爾之德隣爾膺予之慎選典
刑不忘於哀敬提綱唯在於公勤舉司馬法勿踵近習各
膺重位企佇上酬宜於夙夜無孤官業璪可守刑部尚書
散官勲賜如故滌可行尚書左丞散官封如故璵可權知
尚書兵部侍郎散官勲封賜如故

裴休除禮部尚書裴諗除兵部侍郎等制

勅冉有仲由孔門之高弟也尚曰處於小國可爲具臣况

今照臨百官撫御四海綰牢籠漕輓之職掌五兵六師之
重次第超擢爲吾大寮若非僉諧豈敢輕授正議大夫守
尚書兵部侍郎兼御史大夫統諸道鹽鐵轉運等使上柱
國河東縣開國子食邑五百戶賜紫金魚袋裴休仁義禮
樂文行忠信積此八者以爲成人前宣歙池等州都團練
觀察處置等使大中大夫檢校左散騎常侍兼御史大夫
上柱國河東縣開國男食邑三百戶賜紫金魚袋裴諗在
元和代理惟帝念功四夷九州文化武服咨爾先父實著
大勲天必祚仁門有令嗣道直才富行備名高文學而決

洽專精率履而清淨恭儉而皆周歷華顯踐更臺閣處事
可法出言成章咸輟自綸闡任寄方伯教訓以禮生聚以
仁千里封疆一口歌詠休乃命以取士時稱得人用其公
方委之管榷事爲之制曲爲之防鉤校奸賊末減賦取公
財不耗疲人樂生望爲準繩立作據依名實兼備德位兩
高漢史曰理行尤異者就加禮曰有功於人者進律秩崇
八座宮副夏卿舉以授之予亦恡夫宰相佐天子公卿
助宰相股肱指臂任同一身有事必言未爲越局無自愛
惜勉荅寵榮休可禮部尚書依前統諸道鹽鐵轉運等使

諭可權知尚書兵部侍郎散官勲封賜各如故

畢誠除刑部侍郎制

勅士師臯陶之恤刑司寇蘇公之用獄既盡哀敬能致治
平擢爲大寮膺茲慎選出於予志命以誠臣翰林學士朝
散大夫守中書舍人上柱國平陰縣開國男食邑三百戶
賜紫金魚袋畢誠學臻壺奧文越拘攣常以忠信用爲前
後爰自郎署擢居內庭謀議有同於壽王奇異輒委於嚴
助竭盡心力裨補機要旣久歲序須議遷昇今者耕夫服
田戎馬不駕欲使凡一手足皆獲措置是故用汝典予刑

罰汝其往哉吾今告汝吾聞孔子曰古之聽獄求所以生
之今之聽獄求所以殺之宜念格言深思倫要勉服休命
以稱朕意可權知尚書刑部侍郎散官勲封賜如故

韋有翼除御史中丞制

勅昔貞觀開元之爲理也遠隱必見情僞必知天下如一
家兆庶如一人無他道也綱目皆振法令必行祖宗在天
方冊在地人存政舉行之非艱故用正臣委之邦憲朝請
大夫守尚書刑部侍郎上柱國賜紫金魚袋韋有翼戴仁
而行抱義以處牆仞裏峻壇宇外寬介特守君子之強文

學盡儒者之業周歷華貫擢爲諍臣攻予甚專言事頗切
願試佐輔移理陝郊馮翊之恐失倪寬潁川之意得黃霸
壺漿迎路襁屬攀車徵爲公卿愈見風采恤刑慎罰守法
當官巍然立朝爲時準直今者跡其率履委之糾繩爾其
念惠文彈理之言思立秋授署之旨三尺律令四海紀綱
所宜公共無鄉上意古人有言曰凡爲虎鼠計於用舍今
之倚任佇觀爾能唯君知臣無累所舉可守御史中丞散
官勲封賜如故

趙真齡除右散騎常侍制

勅仲尼曰慎擇爾臣爲人之道夫語言應對之選爲顧問
耳目之官若非善良必致壅害朝散大夫守太子賓客上
杜國漢中郡開國公食邑二千戶賜紫金魚袋趙真齡其
先君子祇事祖宗出入屏毗餘四十載爾爲令嗣克肖素
風好學頗專樹善不倦凡曰賢彥無不與遊雲水登臨多
聞放志風塵趨競殊不縈心是以長人有慈惠之名處官
無纖介之失其爲行已斯亦多矣丹墀文陛之內貂羽金
蟬之榮超以授之無忝所舉可守右散騎常侍散官勲封
賜如故

韓賓除戶部郎中裴處權除禮部郎中孟璪除工

部郎中等制

勅朝散大夫守尚書水部郎中上柱國韓賓等尚書天下之本郎官皆爲清秩非科名文學之士罕與其選以賓端貞有守以處權俊又出羣以璪才能適用皆茂鄉里之稱咸爲名實之士各服休命勉於官業可依前件

鄭處晦守職方員外郎兼侍御史知雜事制

勅朝議郎行尚書職方員外郎上柱國賜緋魚袋鄭處晦御史中丞韋有翼上言曰御史府其屬三十人例以中臺

郎官一人稽參其事以重風憲如曰處晦族清胄貴能文
博學人倫義理無不講求朝廷典章飽於聞見乞爲副貳
以佐紀綱以爾處晦常居內庭草具密命自以疾去于今
惜之頗俞其言如我自得有翼爲爾之知己余爲有翼之
德隣上下交舉豈有私愛勉修職業所報非一可守本官
兼侍御史知雜事散官勲賜如故

庾道蔚守起居舍人李文儒守禮部員外郎充翰

林學士等制

勅天下爲公選賢與能也况乎拔出流輩超待帷幄豈唯

獨以文學止於代言亦乃密參機要得執所見若非賢彥
豈膺選擢將仕郎守起居舍人庾道蔚善行必備重價無
對嘗自侯府升爲諫臣每直言而盡誠不違忠而偶意朝
議郎行尚書禮部員外郎上柱國賜緋魚袋李文儒才行
冠時名聲譁衆揚厯臺閣宣昭職業無入而不得其道守
正而莫混其源並爲儒者之英咸蘊賢人之操久遊安在
相見何晚禮曰君子稱人之美則必爵之我旣言矣亦能
繫維宜盡忠讜以酬寵遇並可守本官充翰林學士餘各
如故

李朋除刑部員外郎李從誨除都官員外郎等制
勅書曰庶獄庶事予罔敢知此乃周文王之所以理天下
也惟獄惟事會於南宮求郎之難豈敢輕易將仕郎侍御
史內供奉李朋能積行實發其詞華勁正端慎言業克舉
天平軍節度副使朝議郎檢校尚書祠部員外郎兼侍御
史賜緋魚袋李從誨宗室子弟美秀而文嘗經磨涅不改
堅白今者取自憲府擢於幕吏各有所授皆爲清秩當自
宣室受讞之際思滿堂飲酒之言至於刑章尤繫念慮予
曰罪爾勿罪予曰寬爾勿寬問法何如無鄉上意各宜勉

勵勿自輕怠朋可守尚書刑部員外郎散官如故從誨可
守尚書都官員外郎散官如故

權審除戶部員外郎制

勅文林郎守尚書水部員外郎權審湖嶺旱暵百姓枵耗
老弱死道上強壯入賊中爰求使臣以救其弊執事者上
言爾審學古有文通知理道遂使乘驛視吾飢人果能臨
事知權受命達旨慰撫流散宣導恩澤蠲貸逋逸能裁闊
狹大小輕重各合事宜雖古所謂直指繡衣美俗使者言
之於爾無以過焉用超名曹以酬往效無曠官業勉服休

命可守尚書戶部員外郎散官如故

皇甫鈺除右司員外郎鄭濂除侍御史內供奉等

制

勅夫聖人之理百代同道無他術也綱紀盡舉而關轄不寬故提綱主轄之司爲邦立理之本言於其屬豈敢輕取浙西道都團練副使朝議郎檢校尚書刑部員外郎兼侍御史賜緋魚袋皇甫鈺鄉里秀人臺閣名士能以文學發爲官業朝議大夫前守河南縣令上柱國鄭濂生於清族克肖素風凡守郡邑皆著理行會府藜委之任憲司抨彈

之職委之授汝得不戒之夫爲政也日夜思之勤而行之
此乃子產之言也剛亦不吐柔亦不茹此乃詩人之所稱
也四海百司之條目舉之在勤破制壞法之奸蠹糾之在
敢率是二者可曰當官各服寵榮無忝遷擢鉅可尙書右
司員外郎散官賜如故濂可侍御史內供奉散官勲封如
故

韋退之除戶部員外郎裴德融除殿中侍御史盧

穎除監察御史等制

勅仲尼見負版者則必式之此言爲國根本不敢不敬况

其官屬豈可輕用漢家授署御史多於立秋蓋以風霜始
嚴鷹隼初擊古人垂旨可以知之朝議郎行殿中侍御史
韋退之等皆章甫高危逢掖褻博表裏文行師法典常退
之嘗歷憲臺久居官次性既安靜事皆達練德融典校延
閣服膺羣書美價廣譽旁溢遠暢穎佐賢侯名聲藉甚畱
滯在外而非所宜地官爲郎南臺持斧皆有職業佇見風
彩各思率勵以副甄昇並可依前件

李蔚除侍御史盧潘除殿中侍御史等制

勅將仕郎守殿中侍御史李蔚劔南西川節度判官朝議

郎檢校尚書禮部員外郎兼侍御史上柱國賜緋魚袋盧
潘等夫法不立而化行惡不去而善進雖使堯舜在上未
之有也故御史之舉職者前代有埋輪都亭之奏國朝亦
有戴豸正殿之劾若非端勁知名之士不在斯選蔚以文
行進用已著勞効潘以儒雅流聞今膺拔擢有司列狀詞
旨頗公使吾綱目盡張隄防不壞不在法吏其在他乎朕
闢祇宮之門開天下之口企以待理無有厚薄爾等吐茹
侮畏之道能不愧於詩人斯塞職矣可不勉之蔚可侍御
史散官如故潘可殿中侍御史散官勲如故

盧告除左拾遺制

勅承奉郎行京兆府長安縣尉直史館盧告朕觀不理之
代無他道也取唯諾之士爲耳目之官是以太宗皇帝之
理天下也德爲聖人尊爲聖帝三日不諫必責侍臣况予
寡昧固多遺闕不官才彥安能知之告是吾賢卿老之令
子弟也以甲科成名以家行著稱取自史閣拔居諫垣夫
朕之不德吏之不平政之失中人之不寧四者之闕悉陳
其志此乃漢文帝開諫諍之詔也忠告不倦爾當奉職自
用則小子不吝過勉思有犯無事遜言可依前件

蕭峴除太常博士制

勅禮至則無怨樂至則不爭揖讓而理天下者禮樂是也
今國家上法三代下採兩漢質文隆殺皆有舊章今命博
士非欲革其儀法但使提舉考習而已登仕郎守祕書省
著作佐郎蕭峴聞爾昆弟之間著友愛之稱復能於知己
依投之地竭力報効况乎富有文學默守恬退執心處已
不亦多乎爾其爲吾折中輕重詳校疑似使祝宗卜史之
徒不敢以近習欺爾斯則可矣勉於自強可守太常博士
散官如故

杜濛除太常博士制

勅守左拾遺杜濛爾五廟祖嘗佐太宗同安生人共爲天下者也爾能自以文學策名清時升爲諫臣豈曰虛授如聞同列牆進而不爾容爾亦拜章自陳極辭貢憤乃令徵辨盡知其由僉曰爾以齒少有才不能韜晦或處衆矜已或遇事褊衷言於慎微則亦乖矣仕於清貫斯豈廢乎考衆惡必察之言懲怨不在大之說官移禮寺跡去掖垣屈旣伸眉事亦存體酌此二者頗得中道况乎職業至重蘊蓄可施無使衆多復有窺測可太常博士

馬曙除右庶子王固除太僕少卿王球除太府少

卿等制

勅前度支河東振武天德等道營田供軍使檢校太僕卿
兼御史中丞馬曙等或以文學策名或以吏才進用久更
官次皆著勞効西漢趙充國八十老將通知四夷以爲排
折羌虜非穀不可今浚稽山南遮虜障北坐甲待食不下
十萬曙以文學之暇頗好論邊果能峙糧飽吾戰士固比
爲郡亦報善政球倅賓席得專畱事兵於其郊所命皆具
東朝崇秩列寺貳卿各服官榮以俟昇擢可依前件

李叔玫除太僕卿高証除均州刺史萬汾除施州

刺史等制

勅壯武將軍檢校太子賓客前兼右金吾衛將軍監察御史上柱國襲岐國公食邑三千戶食實三百七十戶賜紫金魚袋李叔玫等夫伊呂之爲將也每以救扶爲心故其苗裔福隨殷周我西平王功存社稷慶流後嗣子孫多賢裂土分茅玫宏毅知書洵美且武儒士多譽將才頗高慶忌一門盡有爪牙之用金敞舉族皆著忠厚之名置將軍之符列卿寺之任曰文曰武唯上所命首爲才士實曰寶

臣証之與汾爲吏歲久文學績效皆有可觀清江武當有
人有賦豈自薄小宜遵詔條無忝寵榮以稱朕意可依前
件

李珣冊贈司空制

維大中六年歲次壬申五月丁卯朔十六日壬午皇帝若
曰國有元老道可咨稟天命不助倏然去我宜加褒命以
慰重泉咨爾故淮南節度副大使知節度事管内營田觀
察處置等使金紫光祿大夫檢校尚書右僕射兼揚州大
都督府長史御史大夫上柱國贊皇縣開國公食邑一千

五百戶李珣立德行道繼長增高貴而益修老而彌篤在
文宗朝徧歷清近內備顧問嘗摧奸克外領事權善提故
典爰付魁柄實肖象求鎮撫四夷莫不信順訓導百吏皆
有程品左官荒服衆寃非罪事君以道知我其天李固之
確論無私周公之金縢終啓自朕統御尊敬舊老分委戎
輅作鎮孟津訓兵令行治人化洽飽聞聲譽渴見風彩以
大冢宰徵歸朝廷讜直忠貞骨鯁魁礪凡所陳啓無非法
誠遂乃裂授東夏表率諸侯能救饑艱克爲康泰初陳微
恙請捐重寄驛騎奔問待醫臨理旋聞大病却食涕流命

欽定全唐文 卷一百四十一
也柰何痛悼不及今遣使某官某副使某官某持節冊贈
爾爲司空魂而有知鑑茲誠意嗚呼哀哉

歸融冊贈左僕射制

勅有祿位而享富貴啓手足而歸壤樹身沒名著生榮死
哀蔚爲大臣宜遵贈典故金紫光祿大夫守太子太傅分
司東都上柱國晉陵郡開國公食邑二千戶歸融發於文
華揚歷清近業冠前輩才高當時摠領屬官預聞政事凡
曰繁劇無不踐更刃皆有餘施無不可徧處重位內修典
法二乘戎輅外作屏毗富而不驕貴而愈謹曾參三省太

叔九言服以行之終身不倦實士林之君子爲朝廷之表
臣未究高年遽聞長夜爰舒痛悼用加顯位命之寮長以
慰重泉可贈尚書僕射

令狐定贈禮部尚書制

勅朕有表臣作鎮南服天不助我遽此殲奪用崇飾終之
典以舒痛悼之誠故桂州本管都防禦觀察處置等使銀
青光祿大夫檢校左散騎常侍持節都督桂州諸軍事兼
桂州刺史御史大夫上柱國令狐定始自結髮至於壽考
直道而行靡有悔德初以友愛藹閨門之風中以文學膺

鄉里之選終以德業爲名實之臣爰自郎吏至於藩翰事
藜必理刃皆有餘去載桂陽雖云旱耗聞其風俗芬若椒
蘭昔爾元昆輔我聖考今汝猶子相子冲人公忠貞正衡
鏡法式煥乎當代萃於一門上有攸助急難之名下有慈
愛教誨之道聞於論者爾其得之跡去難畱川逝不捨追
命宗伯以慰重泉往而有知鑑我厚意可贈禮部尚書

李訥除浙東觀察使兼御史大夫制

勅仲尼以舉賢才則理大禹以能官人則安况西界浙河
東奄左海機杼耕稼提封七州其間繭稅魚鹽衣食半天

下不有可仗豈宜委之正議大夫使持節華州諸軍事守

華州刺史兼御史中丞充潼關防禦鎮國軍等使上柱國

隴西縣開國男食邑三百戶賜紫金魚袋李訥溫良恭儉

齊莊中正實以君子之德華以才人之辭揚歷清顯昭彰

令聞輟自掌言式是近輔子貢爲清廟之器仲弓有南面

之才智莫能欺剛亦不吐表率教化皆有法度今者兵爲

農器革作軒車言於共理在擇循吏是故用已效之績託

分寄之任擁蓑旆而服元玉化千里而有三軍儒者之榮

莫過於此孔子曰仁者愛人智者知人愛人則疲羸可蘇

知人則才幹不棄土宇既廣殺生在我達此二者可以報
政榮加副相用壓大邦爾其勉之無忝所舉可使持節都
督越州諸軍事守越州刺史兼御史大夫充浙江東道都
團練觀察處置等使散官勲封賜如故

盧博除廬州刺史制

勅夫立人長伯此周文王所以敬事上帝也况廬江五城
環地千里口衆賦重豈可輕授朝議郎守尚書刑部郎中
上柱國賜緋魚袋盧博以文學策名才能入仕周歷臺閣
嘗宰繁劇鬱有佳譽兼報善政今者出郎官之帳懸太守

之章言於清時不爲不遇上有命則違之上有好則效之此乃成王命君陳之言也故行令不如行化律人不如律身念茲二者可長人矣無忝分寄爾其勉之可使持節廬州諸軍事守廬州刺史散官勲賜如故

李文舉除睦州刺史制

勅夫三尺律令人情出於其中耳苟情有不可亦法無本正議大夫權知宗正卿上柱國隴西縣開國伯食邑七百戶賜紫金魚袋李文舉宗室子孫初以地進累居官次皆著能名是以取自遠藩擢爲宗正大則提舉羣吏灑掃

守奉次則整訓屬族次第昭穆唯此二者爾之職焉今則
狂盜公然侵犯陵寢毀積之罪已坐首令責師之義固難
矜寬勉於分憂足以補過可使持節睦州諸軍事守睦州
刺史散官勲封賜如故仍馳驛赴任

竇宏餘加官依前台州刺史蘇莊除鄧州刺史等

制

勅朝散大夫使持節台州諸軍事守台州刺史王柱國竇
宏餘朝議郎前使持節虔州諸軍事守虔州刺史上柱國
賜緋魚袋蘇莊等南郡盜作而蕭育拜河內政美而寇恂

畱爲人擇官因重而撫考於兩漢行古道也宏餘廉使上
言父老有請其爲政也長育多方惠訓不倦凡設教令皆
有科指莊任南康悉心爲理謹身律下節用愛人南陽古
都近者小擾臨海越俗尤惜良吏就加超拜各叶所宜仕
至二千石可庇人矣無異文律不自貴重副疲羸之望者
須念始終坐狂愚之罪者勿理深污各膺寵祿無忝分寄
宏餘可檢校太子右庶子餘如故莊可使持節鄧州諸軍
事守鄧州刺史散官勲賜如故

李暨除絳州刺史魏中庸除亳州刺史曹慶除威

遠營使等制

勅中散大夫使持節亳州諸軍事守亳州刺史充本州團
練鎮遏使雲騎尉賜紫金魚袋李暨等昔貞觀末遣孫伏
伽等二十二人各以六條巡察郡縣以能進者止二十人
獲死者七人流竄黜免僅千百輩以太宗皇帝上聖憂勤
之切百執事奉法公謹之心守臣爲奸如此之衆况今黜
陟久廢仕進多門緬思疲人每渴良吏牧守之念予常軫
懷暨實文士出典兵郡不薄爲吏愛我百姓盜賊奸究寢
而不作鰥寡孤獨皆有所養中庸再分符竹聞立善政凡

爲理者皆高仰之今用已效之才各委共理之任簿書刀
筆俗吏事耳慈惠教化君子宜之二者較然爾欲何取慶
乃身帶兩綬兵分禁營得佩牛刀立於交戟或有鄉里之
譽克肖友悌之風百里長人在王畿內各思答效無忝寵
榮可依前件

其文有文辭之風百里身入由王端內各思答效無殊
 以化帶兩端其令禁營於冊中乃立效文輝也存誠聖
 學分文事且效思於外君子宜之二者輝然爾始何如
 其文有文辭之風百里身入由王端內各思答效無殊
 以化帶兩端其令禁營於冊中乃立效文輝也存誠聖
 學分文事且效思於外君子宜之二者輝然爾始何如

其文有文辭之風百里身入由王端內各思答效無殊
 以化帶兩端其令禁營於冊中乃立效文輝也存誠聖
 學分文事且效思於外君子宜之二者輝然爾始何如
 其文有文辭之風百里身入由王端內各思答效無殊
 以化帶兩端其令禁營於冊中乃立效文輝也存誠聖
 學分文事且效思於外君子宜之二者輝然爾始何如

欽定全唐文卷七百四十九目錄

杜牧二

李誠元除朔州刺史制

薛逵除秦州刺史制

田克加檢校國子祭酒依前宥州刺史制

薛淙除鄧州任如愚除信州虞藏玘除邛州刺史

等制

鄭液除通州刺史李蒙除陳州刺史等制

王晏實除齊州吳初本巴州陳佺渝州刺史等制

郭瓊除渠州郭宗元除興州等刺史王雅康除建
陵臺令等制

吳從除蓬州賈師由除瓊州蕭蕃除羅州刺史等
制

裴闕除溫州刺史伊實除獻陵臺令等制

陸紹除信州刺史封載除遂州刺史鄭宗道除南
鄭縣令等制

張德翁除歸州刺史李承訓除福昌縣令盧審矩
除陽翟縣令等制

王樟除雅州刺史郭鎔除右諭德等制

傅孟恭除威州刺史宣敏加祭酒兼侍御史依前
宣歙道兵馬使防秋事等制

姚克柔除鳳州刺史韋承鼎除櫟陽縣令王仲連
贊善大夫等制

朱載言除循州刺史袁循除渭南縣令張公及除
獻陵令韋幼章除京兆府倉曹等制

支某除鄆王傅盧賓除融州刺史趙全素陵福陵
令等制

鄭悛除大理少卿致仕制

王釗除皇城留守制

王知信除左衛將軍史寰除右監門衛將軍等制

張直方授左驍衛將軍制

朱叔明授右武衛大將軍制

梁榮幹除檢校國子祭酒兼右神策軍將軍制

呂衛除左衛將軍李銖右威衛將軍令狐朗除滑

州別駕等制

張幼彰程修已除諸衛將軍翰林待詔等制

一品孫李明遠授左千牛備身等制

李鄠除檢校刑部員外郎充鹽鐵嶺南留後鄭蕃
除義武軍推官等制

韋宗立授檢校倉部員外郎知鹽鐵廬壽院等制
房次元除檢校員外郎充度支靈鹽供軍使等制
李知讓加御史中丞依前邠州刺史韋瓊加侍御
史充振武軍掌書記等制

崔彥曾除山南西道副使李詵山東道推官楊元
洛京兆府法曹等制

李承慶除鳳翔節度副使馮軒除義成軍推官等

制

夏侯瞳除忠武軍節度副使薛途除涇陽尉充集

賢校理等制

蕭孜除著作佐郎裴祐之陝府巡官崔滔櫟陽縣

尉集賢校書等制

楊知退除鄆州判官薛廷望除美原尉直宏文館

等制

白從道除東渭橋巡官陶祥除福建支使劉蛻除

壽州巡官等制

盧籍除河東副使李推賢除殿中丞高湜除湖南
推官薛廷傑除桂管支使等制

鄭碣除江西判官李仁範除東川推官裴虔餘除
山南東道推官處士陳威除西川安撫巡官等
制

裴詒除監察御史裏行桂管支使等制

石賀除義武軍書記崔涓除東川推官等制

顧湘除涇原營田判官夏侯覺除鹽鐵巡官等制

趙元方除戶部和糴巡官陳洙除長安縣尉王巖
除右金吾使判官等制

韋承鼎除左贊善大夫韋諝除尚食奉御柳謙除
壽安縣令韋選除義昌軍推官錢琦除滄景支
使等制

康從固除翼王府司馬制

張正度除汾州別駕等制

馬迥除蜀州別駕等制

高駢除祭酒兼侍御史依前充職右神策軍兵馬

使制

忠武軍都押衙檢校太子賓客王仲元等加官制
右神策軍押衙檢校太子賓客尚漢美等叙勳制
右龍武軍大將軍劉誠信等三十三人叙階制

本館先軍大洲軍國總制等三十三人

本館先軍大洲軍國總制等三十三人

本館先軍大洲軍國總制等三十三人

本館

欽定全唐文卷七百四十九

杜牧二

李誠元除朔州刺史制

敕銀青光祿大夫檢校國子祭酒前使持節都督勝州諸
軍事兼勝州刺史御史中丞充本州押蕃落及義勇軍等
使上柱國李誠元開元時吐蕃止書悖慢無禮皆邊將造
僞交鬪華夷冀立功勲以求爵賞自長慶已降怠於制置
西北守帥多非其人侵虐種落厚自封殖至使忿驚之性
不甘欺奪之苦近者聚爲內寇主乃騷動天下因令循撫

果效信順是以屢詔執事慎於選求僉曰誠元家本北邊
志氣慷慨將軍之子頗傳父業學萬人敵知四夷事跡榆
林之前政寄馬邑之名邦仍留兼官用震殊俗夫車馬甲
兵戰之器也禮樂慈愛戰所蓄也然後要之誠信禦以堅
明雖曰戎狄豈不畏服深期國士無頽家聲可檢校國子
祭酒使持節朔州諸軍事兼朔州刺史御史中丞散官勳
如故

薛逵除秦州刺史制

敕兵者凶器也將者死官也若不擇才必有陷敗銀青光

祿大夫檢校右散騎常侍使持節隴州諸軍事兼隴州刺史御史大夫充本州防禦使上柱國薛逵匈奴犯塞李廣逢時爪牙甚堅翅翼頗健任以汧隴倚戎守封當賜輒分軍租不入士爭爲死虜不敢犯今以天水名郡號爲新都用汝守之期於鎮靜無召戎生事無翫兵邀功正封疆守禮信險走集嚴候伍邊將之道莫過於斯玉印貂冠皆爲榮秩壯爾軍旅惟恐不多勉礪鋒鋌以期報效可檢校左散騎常侍使持節秦州諸軍事兼秦州刺史御史大夫充天雄軍使兼秦成兩川經畧及義寧軍行營鎮遏都知兵

金匱全唐文 卷七十四
馬使本道營田等使散官勲如故

田克加檢校國子祭酒依前宥州刺史制

敕銀青光祿大夫檢校太子賓客使持節宥州諸軍事兼
宥州刺史御史中丞充經畧軍使押蕃落副使左神策軍
宥州行營都知兵馬使上柱國鴈門郡開國侯食邑一千
戶田克加臬俊無敵感激輕生李信之氣蓋關中陳安之
勇聞隴上委以邊郡能得士心寇圍陰河守陴甚寡爾乃
萬死不顧一奮無前奇兵徑衝驍騎橫挑圍開孤壘戰敗
豪羌言念忠勞豈愛爵賞貽以崇秩用酬奇功畢萬匹夫

也百戰皆獲有馬百乘死於牖下死不在寇此乃趙鞅誓
眾之辭也宜念古人之言勉作萬夫之特可檢校國子祭
酒餘並如故

薛綜除鄧州任如愚除信州虞藏玘除邛州刺史

等制

敕朝議郎前使持節坊州諸軍事守坊州刺史薛綜等仲
尼對魯哀公曰人道之大莫先爲政漢宣帝曰與我共治
者其唯良二千石乎念先師賢帝之言思疲人良吏之選
夙興夜寐不忘於此綜以文科入仕命守邊郡屬當伐叛

金定全唐文 卷之四十九 三
兵於其郊處劇不繁事叢皆辦如愚進以門子屢爲長吏
其爲政化可差古人藏玘與逢閱官簿而頗多言理名而
亦著紹元嘗聞謹慎可宰百里已所不欲勿施於人無忘
格言副我優寄可依前件

鄭液除通州刺史李蒙除陳州刺史等制

敕朝議郎前守太原府晉陽縣令上柱國鄭液等今之郡
守爲人師帥宣上教化者也以液久在官途嘗宰大邑聞
其爲治人歌舞之以蒙執爰前驅予之雄也光祿護塞居
延視胡虜不敢窺士爭爲死各委分寄實曰遷升通州雜

以華夷淮南兩有兵賦爾其往哉今用誠爾爲天子之守
臣作百姓之長吏言於仕進可曰顯榮夫君子之道先有
諸已後求於人苟能律身始可檢下勉詳詔令用謹理行
從規始於門子入仕恭謹無尤自州佐而升在朝班列五
尚而職於三服亦爲良遇無忝官常可依前件

王晏實除齊州吳初本巴州陳佺渝州刺史等制
敕正議大夫前使持節淄州諸軍事守淄州刺史上柱國
太原縣開國男食邑五百戶賜紫金魚袋王晏實等俟善
政而後用或蔑無所聞滯序進之常途則怨生於下古今

政柄患斯二者晏實初本挺等三人入仕年多亦嘗爲郡
聞無悔吝是熟詔條濟南跨河有兵有賦巴渝夷俗慷慨
豪健形於樂曲爾其往哉古之人有言曰子苟爲善誰敢
不勉身率以正孰敢不正欲謹於行在於廉平宏宗溫慎
有餘王屬咸爲清秩銖以文學嘗佐賢侯作掾京兆亦曰
美仕皆有官業慎無自薄可依前件

郭瓊除渠州郭宗元除興州等刺史王雅康除建

陵臺令等制

敕大中大夫前使持節文州諸軍事守文州刺史兼侍御

史充本州鎮遏使上柱國郭瓊等鄰山順政僻處山谷罕
知文律易爲欺奪瓊與宗元守郡宰邑聞無悔吝爾其往
哉仲尼曰正身而人正欲善而人善撫我疲俗宜遵格言
苟或不臧貽爾之戚雅康入仕嘗在班列青宮贊導陵邑
守奉若非謹慎不膺斯任可依前件

吳從除

川賈師由除瓊州蕭蕃除羅州刺史等

制

敕中散大夫前使持節柳州諸軍事守柳州刺史上柱國
賜紫金魚袋吳從等地遠京邑俗雜蠻夷不知文律易爲

欽定全唐文 卷一百四十九 五
欺奪朝廷選置多無名人小則抑鬱不伸大則聚以爲寇
蓬緣巴徼其風忿勁瓊處海外在兩漢時往往小反羅居
百越磳洞深阻咨爾三吏比嘗爲郡亦報有政勿以荒服
侮我疲人或異詔條必寘厥辟稍當叙進優以上佐苟有
聞見無忘裨助可依前件

裴閱除温州刺史伊實除獻陵臺令等制

敕正議大夫前使持節忠州諸軍事守忠州刺史上柱國
裴閱等江峽之間其俗剽悍聞爾爲理人惜其去若不遷
陟豈酬政能洎師素等久居官常皆無悔吝半刺列郡人

所咨稟衣冠弓劍之地霜露感思之心尤藉謹良以頴守
奉各服休命勉於始終可依前件

陸紹除信州刺史封載除遂州刺史鄭宗道除南
鄭縣令等制

敕中大夫前使持節申州諸軍事守申州刺史上柱國賜
紫金魚袋陸紹等夫以冉求之才方六七十爲之三年然
後可使足人今者一州之地五六於此况上饒參以越俗
遂寧旁緣巴徼號爲沃野皆有厚賦委之分寄實難其人
以紹其先君子仍代作相能以儒學緣飾吏理以載頗有

長者之舉聞於士林之間夫二千石所繫朕常留念舉以授爾能不誨乎卹孤獨逮不足修其教徇其宜凡此四者著於王制勉循古道以活疲民宗道宰邑卓然善政廉使上課書爲第一列於遷陟得以不時無易初心以失前効可依前件

張德翁除歸州刺史李承訓除福昌縣令盧審矩

除陽翟縣令等制

敕朝議郎前京兆府渭南縣令上柱國張德翁等德翁承訓審矩爲天子之守臣作百姓之長吏仕而至此斯亦違

矣匹夫爲善人猶則之守令所爲誰敢不化詩曰爾之教
矣人胥效矣可不勉之量助奉陵邑以謹慎選執臨師景
參諒等各以序進亦爲良遇可依前件

王樟除雅州刺史郭銷除右諭德等制

敕朝議郎前守成都縣令上柱國賜緋魚袋王樟等廬山
江關扼東控西南夷置吏不善所虞非細以樟嘗宰劇縣
在會府中條令和平吏人嘉美跡爾前政撫予遠人禮曰
人之所好已亦好之人之所惡已亦惡之以此用心何憂
不理暨銷與綬門子清族閱其官簿入仕已久東南諭導

名藩上寮頗爲優閑宜服休命可依前件

傅孟恭除威州刺史宣敏加祭酒兼侍御史依前

宣歙道兵馬使防秋事等制

敕開府儀同三司檢校國子祭酒前使持節都督銀州諸
軍事兼銀州刺史御史中丞充本州押蕃落及監牧副使
兼度支銀州營田使上柱國清和郡開國公食邑二千戶
傅孟恭等孟恭山西將門并州壯士雖長鉦都討黑稍將
軍校其忠勇無以過也左宦非罪志氣益堅守邦有聞官
業克奉今以威州新造蛇豕之衛非爾材力不能控壓遂

以武健佐助戎臣觀其列狀頗著勤效敏於窮塞提挈孤軍樹立和門繕完械用翬飛虹亘者三百間耀雪吹毛者數萬事言其勞績亦少比倫各兼憲班或伏熊軾可曰榮遇無自懈怠可依前件

姚克柔除鳳州刺史韋承鼎除櫟陽縣令王仲連

贊善大夫等制

敕中散大夫前使持節利州諸軍事守利州刺史上柱國姚克柔等仲尼曰人道之大莫先爲政之功者其長人乎克柔嘗典一邦愈知爲理承鼎增宙等開敏有材幹能堪

事河池名郡畿內小侯仕於清時皆爲良遇大凡爲理之
要先事孤弱譬諸草木無倦栽培仲連荏苒宦途歲月滋
久東朝贊道亦曰升遷各慎厥官無忝榮命可依前件

朱載言除循州刺史袁循除渭南縣令張公及除
獻陵令韋幼章除京兆府倉曹等制

敕前靈鹽節度掌書記朝請郎試大理司直兼殿中侍御
史朱載言等刺史縣令皆古之五等諸侯行詔條紀綱專
教化殺生者也得其才則疲人蘇息非其任則百姓愁怨
載言循省問遠等或以吏理進官或以科名入仕當此選

擇聞無悔尤海豐越俗王畿名邑夫邪正表前之影教令
草上之風若非律身不能爲理公及以勤謹膺陵邑慎選
幼章以才敏坐京兆劇曹各有官業無自廢怠可依前件
支某除鄆王傳嘉賓除融州刺史趙全素除福陵

令等制

敕銀青光祿大夫前使持節邢州諸軍事守邢州刺史兼
侍御史充本州團練使上柱國支某等近者控名責實事
不苟且量材適用咸當所宜咨爾某等各於進官亦以勞
久王門爲傳越徼分憂洎守奉園陵毗佐列郡皆曰美秩

盡獲優安各務清勤無掇悔吝可依前件

鄭悺除大理少卿致仕制

敕朝散大夫檢校太僕少卿前兼江陵少尹上柱國鄭悺
四代所貴事皆不同至於尚齒其道一也聞爾久居官次
年踰月制家惟四壁身無一簪今者致政里居亞列半俸
足得安枕几而就頤養敬老之道亦爲優異可守大理少
卿致仕下官勲如故

除皇城留守制

敕銀青光祿大夫檢校刑部尚書前兼左金吾衛大將軍

御史大夫充左街使太原郡開國公食邑一千戶王釗常
侍文陛召見武臺願以五千獨當一隊思長策久安之術
避必戰敢死之虜頗嗤免胄獨能全師洎繁纓趨朝執金
入侍夷險一貫忠勞兩兼子尾之疾雖平郝克之步尚蹇
官崇環衛職實司武入座副相不失舊榮且務優安勉於
遵養可檢校刑部尚書兼右領軍衛上將軍御史大夫充
大內皇城留守散官如故

王知信除左衛將軍史寰除右監門衛將軍等制
敕昭武軍校尉前守右驍衛將軍上柱國賜緋魚袋王知

欽定全唐文 卷七百四十一
信等古人之爲理也不以一眚而掩大功克黃紹子文之
宗霍陽繼博陸之後知信烈祖貝邱之戰可庇十代豈止
曾孫寰父伯仲亦效忠懇提挈全魏歸於朝廷今者寵以
將軍旌其舊德豈惟獨舉賞延之典亦欲使烈士諸將自
爲孫謀彝鎬明誼入仕已久皆無悔吝故有序遷臨封遠
邦蔡毫兵部分憂佐理無忘謹廉可依前件

張直方授左驍衛將軍制

敕朕據南面之尊制一代之命先講百官之法後行四方
之政若有罪不問是倒持太阿有頑不磨是廢去砥石則

拱視天下何以為理雲麾將軍起復檢校刑部尚書兼右
羽林統軍御史大夫張直方席其先人任為邊將披誠向
闕執玉來朝近臣勞郊大匠理第典兵於禁門之內立侍
於交戟之中校其寵榮無與等比而乃每輕法檢恣為遨
蕩擅去宿衛潛遊異縣有司問狀持舌不言以至再三姑
引憊闕古人有云語人必於其倫觀過必於其黨念其生
自戎旅素不鐫琢既觸法網亦可矜容加膝墜泉子常自
慎小懲大誡爾宜知恩不失將軍之榮仍有兼官之重足
得湔洗以俟甄升可銀青光祿大夫檢校刑部尚書兼左

金定全厚文 卷七百四十九
驍衛將軍御史大夫

朱叔明授右武衛大將軍制

敕金紫光祿大夫檢校工部尚書兼左武衛上將軍御史大夫上柱國吳興郡開國公食邑二千戶朱叔明司馬軍令黃帝理法兵家尚嚴始可尅敵邊將破虜詐增首級亦罪之小者漢文時魏尚囚繫漢宣時田順自殺開元中幽州長史趙含章大破奚虜旋坐贓賄放流瀼州縱有功勞不贖罪犯是以拓土萬里垂功中興自長慶已還益輕邊事選拔將帥多非賢良豪奪種落蹄角之畜割削士卒衣

食之賜見利則往見弱則欺罔酬恩榮不顧廉恥積帛藏
鏹邱累陵聚是以戰士離落兵甲鈍弊積三十年擲之不
問近者伐叛益知其由屢下詔書誥誠深切豈知頑昧不
可鑄琢嗟爾叔明材惟樸橄性命淺狹其兄叔夜以賊抵
刑不出私門可視覆轍忝據藩翰已積歲時料甲峙糧旣
乏素效事虜接戰不報寸功而乃公欺降戎乾沒戰馬歸
充伏櫪告以敝帷人之無良一至於此昔曹劌請戰卜式
輸財俱是匹夫不與公食爾乃貴擁旄鉞任倚邊陲何其
用心與古相萬諫臣拜疏前罰未塞尚爲恩貸不失將軍

分務洛師可以循省可右武衛大將軍分司東都散官勳
封如故

梁榮幹除檢校國子祭酒兼右神策軍將軍制

敕北落親軍夾峙宮省選忠勇者爲吾爪牙右神策軍奉
天鎮都知兵馬使銀青光祿大夫檢校國子祭酒兼右威
衛將軍御史大夫上柱國安定郡開國公食邑二千戶梁
榮幹射必落鵬力能扼虎自晦雄毅益守謙恭故能塞護
長榆兵分細柳恩加士卒名著勲勞今日擢掌五兵榮懸
三綬勉礪鋒鏑上答寵光可檢校國子祭酒兼右神策軍

將軍知軍事御史大夫充馬軍都虞侯散官勲封如故

呂衛除左衛將軍李銖右威衛將軍令狐朗陰滑

州別駕等制

敕忠武將軍前左武衛將軍兼澧州長史合川郡公賜紫金魚袋呂衛等衛爲天驕之魁來就諸臣之位誠敬忠信不失其常銖朗入仕歲久閱官頗多聞無尤違是率理道將軍上佐半刺之任言於清時皆爲美仕帖以祿秩之綬用嘉慕義之心慎無自輕勉於敬畏可依前件

張幼彰程修已除諸衛將軍翰林待詔等制

欽定全唐文 卷七百四十九
三
敕翰林待詔昭武校尉前守左驍衛將軍上柱國賜紫金魚袋張幼彰等幼彰修已鴻都奏技攻於丹青用志不分與古爭品審以武進晚能知書屢以辭章上千丞相知實以謹良綰務師儒以詳練守職或藝或勞或遷或拔將軍佐僚皆爲寵擢各守職秩無忘專慎可依前件

一品孫李明遠授左千牛備身等制

敕一品孫李明遠三品孫韓錡等立侍交戟纔能勝冠出入見君父之尊師資益忠孝之道流離少好騏驥老成宜念聿修慎無欲速明遠可致果副尉守左千牛備身錡可

翌麾校尉守左千牛備身

李鄠除檢校刑部員外郎充鹽鐵嶺南留後鄭蕃
除義武軍推官等制

敕前鳳翔節度副使朝議郎侍御史內供奉賜緋魚袋李
鄠等五嶺之表地遠京邑吏以法制奉公下以文律自持
蓋亦寡矣而鹽鐵權束之籍延袤萬里若當其才非唯山
澤之饒歸於公上亦得以遠人利病聞於朝廷今吾丞相
揣摩親規改易舊制以鄠文學廉慎當官挺然嘗倅賢侯
號爲名士以此委任必有可觀蕃瑾嗣閔咸有才賢佐蕃

評刑知己所請各進官秩皆爲榮遇宜思報効無累薦延
可依前件

韋宗立授檢校倉部員外郎知鹽鐵廬壽院等制
敕權知鹽鐵廬壽院事朝請郎侍御史內供奉韋宗立等
近者恢復河湟訓定羌虜江湖之間人安而不擾供饋之
費財有餘而力不感實由管權委之名臣今者尚書休以
爾宗立等上言咸曰清白處已勤慎奉公予安能知無不
可者暨頡與潛皆稱名士自有丞相爲爾已知守職佐藩
無忝新命可依前件

房次元除檢校員外郎充度支靈鹽供軍使等制
敕前知度支河南院事朝散大夫試太子司議郎兼侍御
史上柱國賜緋魚袋房次元等有司臣各言爾等或以科
名文學或以清白才用列於薦籍其辭甚美分金穀權運
之務無忘謹廉佐諸侯將軍之府宜竭裨助報知苟盡能
不達乎爾其勉之可依前件

李知讓加御史中丞依前邠州刺史韋瓊加侍御
史充振武軍掌書記等制

敕大中大夫使持節邠州諸軍事守邠州刺史充兵馬留

後上柱國賜紫金魚袋李知讓等以知讓所理雜以華夷
宜假霜臺用壓戎落瓊瑋觀等皆吾卿大夫之令子弟也
戎臣知之請爲佐理夫幕吏之道有事必言知無不爲考
於職分亦無本局各思報效勿事依違可依前件

崔彥曾除山南西道副使李詵山東道推官楊元

汶京兆府法曹等制

敕朝議郎行鄭州管城縣令上柱國賜緋魚袋崔彥曾等
戎臣請士京兆求賢披其薦籍皆曰才能彥曾左官非罪
理人異等詵張王賢客梁苑辭人元汶官決平之司無舞

文之過移爲典獄陟在賓階不累已知惟有直道可依前
件

李承慶除鳳翔節度副使馮軒除義成軍推官等

制

敕朝議郎前守太常丞上柱國李承慶等以文學升名於
有司以才能入仕於官次諸侯辟之以佐於賓席天子用
之以升於朝廷次第等級大小高下亦與古之鄉舉里選
考德試言無以異也爾等皆吾卿大夫之令子弟也清風
素範克肖家聲屬辭彫章能取科第既有知己皆爲才人

賢觀與遊達視所舉今爾賓主兩皆得之義則進否則退
無爲美疚以求苟容可依前件

夏侯瞳除忠武軍節度副使薛途除涇陽尉充集

賢校理等制

敕前昭義軍節度判官朝議郎殿中侍御史內供奉夏侯
瞳等瞳以科名辭學開敏多才久遊諸侯常蘊令聞周知
吏理兼能潔身戎臣上言願爲毘贊旣諾仕以委質宜直
道以酬知途以文行策名節趣清遠言於後進實爲秀人
延閣典校丞相所請勉循階級以至堂奧可依前件

蕭孜除著作佐郎裴祐之陝府巡官崔滔櫟陽縣

尉集賢校書等制

敕在春秋時晉爲諸侯國也尚立公族大夫教育諸卿之
子富有賢哲不假搜聘召同列而會者三百餘年況今天
覆盡得而禹畫無遺名卿賢相之家清風素範之族子孫
森羅髦俊竝作次第叙用豈歎乏才匱使判官將仕郎守
國子監太學博士蕭孜等或以秀異得舉文學決科或以
行實立身遭逢知己皆後生可畏之士爲當時有才之人
兼觀著述殿閣典校參畫幕府開導獻納清秩美職二者

兼之不由階級安至堂奧勉於修慎以候超升可依前件

楊知退除鄆州判官薛廷望除美原尉直宏文館

等制

敕將仕郎前守京兆府藍田縣主簿楊知退等國家盪定
齊魯餘三十年多用名儒鎮之以還古俗其賓吏皆爲秀
彥宏文館四部羣書十八學士詳考理亂鋪陳王道此乃
貞觀之故事也若非名士固不與焉知退文行溫雅副幕
府之求廷望才學聲華膺丞相之選當戰伐之後切於供
饋庠績自以謹幹稱於有司予非能知咸徇其請各宜率

勵無累所舉可依前件

白從道除東渭橋巡官陶祥除福建支使劉蛻除

壽州巡官等制

敕度支東渭橋給納使巡官將仕郎試大理評事兼監察御史白從道等朕以國計出入委於表臣尚書郎當戰伐之餘財穀殫蹙斷長補短以無爲有今者上言三吏皆曰國才校其智能足應事役暨守臣貽孫等亦曰祥蛻文學溫慎可在賓階才者得失之端士者功名之本勉於自勵無負已知可依前件

盧籍除河東副使李推賢除殿中丞高湜除湖南
推官薛廷傑除桂管支使等制

敕河東節度副使朝散大夫檢校大理少卿攝御史中丞
上柱國盧籍等夫諸侯之任重矣其行道也得以阜俗變
俗其行法也得以刑人賞人若張政化得以助業某等上
言咸舉可用籍等或負才器倜儻不羣或以文章策名俊
秀或有幹局可佐圉圉皆徇所請予安能知并州近胡王
業茲始艱難已來何戰不會長沙始安頗聞旱耗各宜良
士以佐賢侯夫直道枉道無他故也取容盡節而已勿慮

後患宜竭報知暨殿省佐僚縣道爲郡豈曰虛授亦當爾
才正霜臺之舊名班芸閣之初命各服寵祿勉於自強可
依前件

鄭碣除江西判官李仁範除東川推官裴虔餘除
山南東道推官處士陳威除西川安撫巡官等

制

敕浙江西道都團練判官將仕郎監察御史裏行鄭碣李
仁範暨虔餘等咸以文行策名清時諸侯知之命爲幕吏
少微四星處士毗輔之宿也天之布列在軒轅前此乃天

石賀除義武軍書記崔涓除東川推官等制

身以報況於知已得已得不勉之可依前件

清廉公謹嘗經職守稱有才能力能古人於一飯之恩尚有殺

等守臣有司上請諸士皆曰詒等士族之中有政事科名

敷前鄆曹濮等州觀察支使朝散大夫試大理評事裴詒

裴詒除監察御史裏行桂管支使等制

已以壯在野並可依前件

門之條沉如魚潛莫若鴻翔非吾賢相爾不肯起勉酬知

意親近賢良先於妃后威者吾能言之耕延陵之臯荷石

敕朝議郎行秘書省著作佐郎石賀等朕寄諸侯之事重
矣大者教化風俗小者惠養黎庶環千里之疆綰三軍之
眾講求倚用不五六人守臣公度仲郢所請賀等各以文
學決科愷悌干祿觀其褒舉皆是才名能報所知能用可
用在爾賓主子不與焉暨鑲與鈞亦稱智敏神州作掾五
庫掌財足展幹能無惰官守可依前件

顧湘除涇原營田判官夏侯覺除鹽鐵巡官等制
敕前振武軍節度判官文林郎監察御史裏行顧湘等近
者循名責實科指稍峻諸侯有司亦各搜選才良以佐物

務湘覺本以文進兼通吏理從周暨魯皆稱幹能于以聲
韻上獻律呂精工雖曰小道亦有可觀徇請酬勞咸加新
命各守職分無忘用心可依前件

趙元方除戶部和糴巡官陳洙除長安縣尉王巖

除右金吾使判官等制

敕攝戶部巡官宣德郎試秘書省校書郎兼殿中侍御史
趙元方等各爲長才自有知己地官平糴專豐耗發歛之
任京尉坐曹決事得操豪猾交戟之內贊佐衛臣言於仕
進皆曰得路勉思報效無累所舉並可依前件

韋承鼎除左贊善大夫韋諤除尚食奉御柳謙除
壽安縣令韋選除義軍推官錢琦除滄景支

使等制

敕前度支東渭橋給納使巡官徵仕郎試大理司直兼殿
中侍御史上柱國韋承鼎等持身謹潔美才周通奉公當
官先勞後祿端雅守道俊秀升名久遊賢侯眾稱君子參
東朝之贊諭分五尚之職秩糾大府羣吏之失提王畿生
齒之籍方六七十長億萬夫金臺嘉招武幄與食法官憲
秩以壯藩垣進於清時皆爲美仕近者屢譴幕吏予豈無

欽定全唐文 卷七百四十九
意蓋欲廓賓階敢言之路誠諸侯自是之尊惟滄新造控
制兩河付之誠臣尤藉良畫若免後患慎勿苟容各修官
業無自媮薄可依前件

康從固除翼王府司馬制

敕新授銀青光祿大夫檢校國子祭酒兼濮州長史殿中
侍御史上柱國康從固其父秀榮實爲名將李廣多爭死
之士竇嬰無入家之金一收七關易如拾芥念爾跨馬事
敵執戈同仇壯比文鴛勇同李敢子之能仕父教之忠占
人之言信不虛設今者願留闕下以奉朝請念其垂誨可

見至誠曳裾憲寮用示恩寵宜思終始上報君親可檢校國子祭酒兼翼王府司馬殿中侍御史散官勲如故

張正度除汾州別駕等制

敕中散大夫前守青州別駕上柱國張正度等各以才能仕進謹慎修身積日累時咸有知己或以序進或徇所請皆佐列郡無怠官常可依前件

馬迥除蜀州別駕等制

敕中散大夫前守彭王府司馬上柱國馬迥等以爾入仕歲久愈知爲理半刺上佐得與二千石參校政事短長利

病者也今以名郡藉其攸助各有兼授以峻等衰慎守官
常無自偷惰可依前件

高駢除祭酒兼侍御史依前充職右神策軍兵馬

使制

敕右神策軍右廂兵馬使兼押衙銀青光祿大夫檢校國
子祭酒前靈州大都督府左司馬殿中侍御史上柱國高
駢禁旅典兵爲吾爪士言念付祿未稱輸勞外之王官帖
以憲秩可曰榮遇無忘盡瘁可檢校國子祭酒兼濮王府
司馬侍御史餘如故

忠武軍都押衙檢校太子賓客王仲元等加官制
敕忠武軍節度右都押衙銀青光祿大夫檢校太子賓客
兼殿中侍御史王仲元等自艱難以來言念許師何役不
行何戰不會居常則長法知禮臨敵則致命爭登標於和
門不忝忠武爾等短衣長劔事寇乘邊觸履艱危無所顧
慮將軍列狀憲班酬勞勿矜常勝無忘淬礪可依前件

右神策軍押衙檢校太子賓客尚漢美等叙勲制
敕前件等拔以貔貅之勇籍於禁旅之中大刀長矛重弓
束矢林會山立星羅翼舒惟以忠勤拱我宸極錫之勲寵

以酬勞瘁可依前件

右龍武軍大將軍劉誠信等三十三人叙階制

敕右龍武軍大將兵馬都知正議大夫檢校太子賓客上
柱國賜紫金魚袋右龍武軍宿衛劉誠信等技以勇聞任
以信普力可挾輶以走敵藝能奪稍以制人常礪鋒銛無
所迴避自拱宸極益展忠勞思以報之何惜階級可依前
件